

DOMENIE V «VIE PAL AN»

Antifone di jentrade Sal 94,6-7

Vignît, adorîn Diu,
butînsi a schene plete denant dal Signôr che nus à creâts;
al è lui il Signôr nestri Diu.

Colete

Ten cont di cheste tô famee, Signôr,
cuntun afiet che nol cognòs polse,
e, midiant che si poe dome inte sperance de gracie dal cîl,
vuardile simpri cu la tô protezion.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE Is 6,1-2.3-8

Ve chi che o soi, mandimi me!

Dal libri dal profete Isaie

Tal an de muart dal re Ozie, jo o ài viodût il Signôr sentât suntune sente alte e metude in alt e i ôrs
dal so mant a cuvierzevin il templi. Sore di lui a jerin serafins: ognidun di lôr al veve sîs alis e un i
berlave a di chel altri:

«Sant, sant, sant al è il Signôr des schiriis;
dute la tiere e je incolme de sô glorie».

I antîi dai soiârs a trimavin pe vôs di chei che a berlavin, biel che il templi si jemplave di fum. E o
ài dit:

«Joi, che o soi lâ!,
parcè che o soi un om cui lavris soçs
e o vîf framieç di un popul cui lavris soçs;
distès i miei vôi a àn viodût
il re, il Signôr des schiriis».

Alore un dai serafins al à svolât viers di me tignint te man un cjarbon impiât che lu veve cjapât sù
cu lis paletis dal altâr. Mi à tocjade la bocje e mi à dit:

«Ve, chest al à tocjât i tiei lavris;
la tô colpe e je tirade vie
e il to pecjât parât jù».

Po o ài sintude la vôs dal Signôr che e diseve: «Cui mandaraio? Cui laraial par nô?». Jo i ài
rispuindût: «Ve chi che o soi, mandimi me!».

Peraule di Diu.

SALM RESPONSORIÂL dal Salm 137

R. Cjantîn al Signôr denant dai siei agnui.

Ti ài agrât, Signôr, cun dut il cûr,
ti cjantarai a ti denant dai dius.

O vuei butâmi in zenoglon viers dal to santuari. **R.**

Al to non o dîs graciis,
pal to boncûr e pe tô fedeltât,
parcè che tu âs fate grande la tô perauale
parsore di ogni altre.

Cuant che ti ài clamât, tu mi âs dade rispueste;

tu i âs dât snait a la mê anime. **R.**

Che ti laudin, Signôr, ducj i rês de tiere,
cuant che a varan scoltadis lis peraulis de tô bocje;
che a cjantin lis stradis dal Signôr
parcè che la glorie dal Signôr e je grande. **R.**

Il Signôr al puartarà al colm par me la sô vore.
Signôr, il to boncûr al è par simpri:
la vore des tôs mans no sta lassâle impastanade! **R.**

SECONDE LETURE 1 Cor 15,1-11

Cussì o predicjìn e cussì o vês crodût.

De prime letare di san Pauli apuestul ai Corints

Us ricuardi, fradis, il vanzeli che us ài predicjât e che o vês cjapât, che o stais salts e che midiant di lui o vês la salvece, se lu tignarês simpri te forme che us al ài predicjât. Se no o varessis crodût propit par dibant!

Duncje prin di dut us ài consegnât ce che jo o ài cjapât, che Crist al è muart pai nestris pecjâts seont lis Scrituris, che al è stât sepulît e al è stât risussitât la tierce dì, seont lis Scrituris; e che i à comparît a Chefa e po ai Dodis. Plui indenant ur à comparît a plui di cincent fradis tune sole volte, che la pluritât di lôr a son ancjemò in vite e cualchidun invezit al è za muart. Po i à comparît a Jacum e po dopo a ducj i apuestui. Tal ultin mi à comparît ancje a mi, propit al ultin di ducj, come a un abort.

Di fat jo o soi l'ultin dai apuestui e no merti nancje di jessi clamât apuestul, parcè che o ài perseguitade la Glesie di Diu. Al è par gracie di Diu che o soi ce che o soi, e la sô gracie in me no je lade strassade: che anzit o ài fadiât plui di ducj lôr; no jo, par dî il vêr, ma la gracie di Diu insiemi cun me. Tant jo che lôr duncje cussì o predicjìn e cussì o vês crodût.

Peraule di Diu.

CJANT AL VANZELI cf. Zn 15,16

R. Aleluia, aleluia.

Jo us ài sielzûts dal mont, al dîs il Signôr,
par che o ledis e o produsedis,
e il vuestri prodot al duri.

R. Aleluia.

VANZELI Lc 5,1-11

Lassât dut, i lerin daûr.

Dal vanzeli seont Luche

In chê volte, intant che al jere su la rive dal lâf di Jenesaret e la fole si strenzeve ator di lui e e scoltave la peraule di Diu, Jesù al viodè dôs barcjis vueidis su la rive. I pescjadôrs a jerin dismantâts e a jerin daûr a lavâ lis lôr rêts. Al montà suntune di chês barcjis, chê che e jere di Simon, e lu preà di slontanâsi un pôc de rive. Si sentà e si metè a insegnâi a la fole stant su la barcje.

Finît di fevelâ, i disè a Simon: «Va là che al è font e bute lis rêts insiemi ai tiei compagns par pescjâ». Ma Simon i rispuindè: «Mestri, o vin sfadiât dute la gnot cence cjapâ nancje un pes; però, su la tô peraule, o butarai lis rêts». Lis butarin e a cjaparin tancj di chei pes che lis lôr rêts a tacarin a spreçâsi. Alore a clamarin i compagns di chê altre barcje par che a vignissin a dâur une man. A vignirin e a jemplarin tant lis dôs barcjis che dibot a riscjavin di lâ sot. Viodint chestis robis, Pieri si butà in zenoglon denant di Jesù disint: «Slontaniti di me, Signôr, che o soi un pecjadôr». Di fat Pieri e ducj chei che a jerin cun lui a restarin scaturîts dai tancj pes che a vevin pescjâts. La stesse robe ur tocjà a Jacum e Zuan fîs di Zebedeu che a jerin compagns di Simon. E Jesù i disè a Simon: «No sta vê pôre; di cumò indenant tu sarâs pescjadôr di oms». Alore lôr, menadis lis barcjis a tiere, a lassarin dut e i lerin daûr.

Peraule dal Signôr.

Su lis ufiertis

Signôr nestri Diu,
che tu âs creât il pan e il vin
soredut par sostentâ la nestre debolece,
fâs, par plasê,
che a diventin par nô ancje il sacrament de eternitât.
Par Crist nestri Signôr.

Antifone a la comunion cf. Sal 106,8-9

Che i disin graciis al Signôr pal so boncûr,
pes robonis che ur à fat ai umign;
parcè che l'anime plene di sêt al à saciade
e l'anime plene di fan al à colmade di robe.

Daspò de comunion

Diu, tu âs volût che o partecipassin
di un unic pan e di un unic cjaliç;
danus, par plasê, di diventâ une robe sole in Crist,
par vivi in serenitât e zovâi a la salvece dal mont.
Par Crist nestri Signôr.